

程

早逢僧笑問新詩一路可催成

題監官楊比部南園別墅

何地風光最易留吳山城郭越江樓醉拋劉景升三雅吟
斷張平子四愁池靜宿鳧依畫檻夜深歸蝠動銀鈎長嫌
到處成追憶垂老重添一舊遊

婁東妓席送李文學往濟南訪故

時唁南藩方歸

十載悲歡事若何相逢仍罕笑顏酡長懷國士無雙遇忍
聽天孫第一歌百越新愁添白髮三齊舊夢入黃河茫茫
世路應難盡只恨人間落日多

李校書院牡丹爲俗客折損賦此惜之

錦幔輕披便已愁，那堪顛倒石家樓。
韓弘近日嫌兒女，劉寶從來愛牯牛。
重待鼓催聲轉促，故將燭照淚先流。
而今盡怕來香塢，鸚鵡簾前罵未休。

過朱元佩別墅留贈

誰家丘壑白雲邊，近日行藏稍世緣。
留客共除三徑草，與僧分種一池蓮。
新調野雀偏勤舞，慣習馴鷗只愛眠。
別去何時最相憶，淡烟疎雨落花天。

北郊傷唐紫瑞遺殯因懷乃弟彥方遠謫未歸

忙遣巫咸叩帝闈，死生俱有未招魂。
重歸老雀悲新塚，一去孤鶻憶舊原。
此世豈能容我輩，彼蒼尤似酷君門。
衰年

久絕傷心淚，不道輕勻便萬痕。

登城懷唐孺舍

突兀高城一望遙，故人知在伯通橋。
西園夢到連春雨，南浦歸來幾度潮。
樓外夕陽花萬樹，壠頭芳草路千條。
誰能此際重回首，賴有啼烏伴寂寥。

送朱甥銜慈命赴京省父

漠漠春橋曉霧低，少年誰解惜分携。
雙帆滿挂心隨鳥，孤劍橫擔氣若霓。
盡羨庭趨依羽仗，誰憐宅相應輪蹄。
臨岐一語須長憶，最是寒閭日易西。

友人粵西歸

五年歸自百蠻鄉。瘴色雖消髮漸霜。隣舍盡聞分蛤蚧客。
筵惟見咀檳榔。閒吟獐女娑羅曲。醉憶番船頓遜漿。爲問
當年舊銅柱。斷山無跡海茫茫。

· 行雲 和人

行雲久不到高唐。消得繁花鎮日香。低按鷓鴣羌竹慢。細
書科斗蜀牋長。當時偶見羅敷陌。此地偏遮宋玉墻。最是
惱人紅箔子。線紋時綻兩三行。

酬王介公遊茅山贈羽士見寄

句曲烟霞舊有情。羨君終得見茅盈。千年未害知龍護。一
頃芝田看鹿耕。金簡徧繙多易識。玉漿初釀便如醒。從今

擬乞新傳訣。恐笑愚翁苦戀生。

冬日索居

閣外寒雲一片黃。木棉殘袖擁繩床。盆魚別貯長移曝。庭
橘重包緊護霜。舉白山妻緣病懶。傳杯野老爲貧忙。休言
卒歲全無計。笑指梅花已漸香。

維揚送西州友人歸投鎮幕

十年縱跡似萍浮。重接弓招返故丘。渭北歸雲難計日。淮
南落木易成秋。馬經戰壘行偏慢。人到離亭醉亦愁。一事
語君君莫悵。近來寶榻半岑牟。

維揚送友南還

西風蘋蓼寂無花重別江亭挽去槎作客向憐同失路送
人纔覺獨離家山盤遠渡潮聲急日落高帆雁影斜若遇
親交應見訊爲言吟苦鬢添華

項莘友倅充以竹物調官暫歸訪贈

世路誰容直似絃北山風雪動歸鞭三年半作乘槎客十
口惟資賣雀錢舊日生徒輕絳帳新來盜賊重青氊鱸魚
有願終難遂枉向谿翁覓釣船

贈雲水陸道翁

雪似髭髯玉似容白頭人記幼曾逢心空道德五千字手
畫羅浮四百峯遙路背琴惟役鬼斷江填石每驅龍幾回

問到長生事只說春城酒正濃

錫山道中遇孫山人梁歸

孫向爲姚大叅兄弟客今
俱捐館

荆谿落木晚悠悠憔悴逢君感舊愁千里故人雙馬鬣十
年遊子一貂裘狂來白眼依然在老去蒼竿好自投莫向
西州嘆零落故林雲物正宜秋

贈三韓廢將劉君

劉爲降孽所讒見遺顧命

踏盡寒雲萬里冰歸來仍是舊東陵時填犢路思盤馬待
人鷗羣尙臂鷹項伯功勳輕玉斗絳侯聲望重金騰如何
不遣人愁悵一曲騶虞淚滿膺

庭中鷄冠一本入冬逾艷感而賦之

風姨霜女妬交加。容得山窓一簇霞。何處關回羅未解。幾時啼罷憤猶斜。羞看夏母傾城國。懶伴麻姑誑蔡家。爲語龍鍾枉相羨。最難留是鬢邊華。

吳江道中

水國春融早見花。一篙新綠漲晴沙。谿邊浙婦驅饑鴨。壠上眠牛帶倦鴉。橋路斷來稀旅店。柳栽多處盡漁家。閒吟已厭江城近。洗盞蓬窓待日斜。

酬友人客中早行見寄

旅行誰許自夷猶。長遣輕霜染敝裘。幾處犬聲雲外路。半窓人影驛邊樓。須知書劍能催老。更是江山盡惹愁。我亦

同遊歸較早。十年先拜睡鄉侯。

垂虹亭遇山陰王中翰之楚幕

十年螭陛初投笏。千里虹橋復繫舟。已羨辰猷追丙魏。旋看掌記伴應劉。官亭落日三聲角。戍浦疎雲四面樓。此地何堪望南北。帝京鄉國兩成愁。

村中酒舍

茅屋粘岡似斗懸。破帘低挿小橋邊。沿街菜許沽童摘。傍檻糕從販客眠。糟架滴殘蕉葉雨。餅壚香散柳溪烟。誰知京雒笙歌夜。一醉紅樓便萬錢。

聽美人清謔

西亭詩
歛袂燈前眼半斜。肯將珠串伴箏琶。馬歸西海愁黃竹。人
去南朝怨白花。柳舍一杯今日酒。榆關萬里昔年笳。斷腸
却要無多物。兩股紅絲四片牙。

送虞陽唐孺舍

唐久客槎里南北迢隔晤對甚艱近
移金閨追別舟次

暮雲春樹兩悠悠。誰道相逢是別舟。白髮滿頭人易醉。青
衫一曲客重愁。他年鷄黍空成諾。近日山川不耐遊。幸有
詩瓢便浮寄。爲君長遣問江鷗。

訪東谿何隱君不遇歸途有作

潦倒村童喚不應。小橋收竹戶加繩。數聲山犬花空落。一
曲筠欄客自凭。正值雨餘應放釣。更逢齋日恐尋僧。斜陽

滿路終難去。惆悵支肩七尺藤。

送閩僧水谷南歸

深鎖禪宮在武夷。仙霞歸路久嫌遲。自停晚食慵持鉢。慣
歷春山厭賦詩。金策遠飛驚瘴鳥。石門纔度泣妖螭。經行
盡是兵爭處。白骨嶙嶙待咒施。

、百舌

到處春風轉轆轤。粟留鸚鵡枉相呼。休誇此鳥如髡衍。只
爲今人重史巫。花塢弄晴香縹緲。霧窓驚曙影模糊。東君
去後應銷歇。還許兒曹問佞無。

村居初夏寄鄭西求表弟

寂寂雙扉晝不開感時誰似子山哀君臣藥竈蛛長滿姊
妹花屏蝶自來髀肉幾曾閒便長鬢毛惟覺老頻摧休言
湖海多知己只許劉盧重往回

贈葑城沈隱君

南城古木盡參天市隱誰知此地偏十寺樓臺分晚照三
橋楊柳接春烟閒拚敝屐嘲茶約日賣新花當酒錢最是
輸君惟一事滄浪池上月初圓

再尋何隱君喜值暮歸留飲言別

誰道頽年事事灰孤筇長到子陵臺畫眉鳴處月初上蒼
耳影中人獨回詩忌正多休浪咏酒緣全減莫添醅何時

移傍花溪住同看沙禽日去來

送陸天符歸四明

倦客何勞嘆阮途敝廬猶在得歸無寒松峭石阿王閣白
鳥紅蓮賀監湖吟戀夕陽遲去舫醉拋殘淚濕行襦可憐
別後誰相憶千里風烟兩釣徒

閱李義山咏史詩感為擬和

莫憑天運委人謀成敗須知總自求後主心肝消辱井上
皇頭頸殉迷樓從來妃子皆能笑更是君王最怕愁便使
堯尊今尚在那堪浮拍對糟丘

公餞陶叅戎移官西行同賦江柳分用唐人咏柳舊韻次李義山

漠漠江烟午未消君家芳樹碧條條武昌城下長舒眼彭澤門前故折腰輕絮半堆青幕舫濃陰全護赤欄橋誰禁客舍今朝淚不出陽關路已遙

再餞陶叅戎 陶起家蜀閬

馬前簫鼓暫留攀為數王程去自艱百戰未叨金鵲印九遷仍到碧鷄山親圖陣法傳裨將盡裂刑書感巨奸此大不堪重悵望秦雲楚水共潸潸

王母

讌罷流霞悵獨歸漢宮重見整雲旂班虬步潤齋壇小紫鳳聲喧禁漏稀已分君王長北面可堪日月但西飛從茲

不羨人間路鎖斷江城碧玉扉


雲間經廢園

辟疆門徑陡榛蕪惆悵繁華事易徂重榭盡空便鳥雀斷廊猶峙穩樵蘇移花買石多時貴運瓦摧垣半舊奴縱是當年看竹客也應疑惟主人無

村中書事

性近村家久更忘此身長不離林塘溪魚吹沫蘋花落田鴨收聲稻葉黃蒲茨已粗償夏稅杞萸行待釀秋霜朝來曾與山僧約又為東隣賽社忙

和友人無題五首



原件短缺

莫羨桃花徧地栽。此生曾是到天台。樓臺有路長難覓。眉
眼無端未易猜。行客肯教携珮去。侍兒惟報買珠回。應知
別後門如水。結得同心誓不開。

其二

簾蒜丁東報罷粧。曉雲猶是殢釵旁。便傾爾國何須笑。欲
返人魂別有香。遊圃贈花惟芍藥。繡窓圖鳥又鴛鴦。不知
誰處會相識。長記侵眉一點黃。

其三

列得名花似畫屏。蝶門雙掩一簾青。菴瓶淪茗多秋片。銀
葉熬香是水丁。生愛月明樓重倚。爲憐人醉板初停。低頭

無限殷勤語。不是劉郎不許聽。

其四

繡幕輕遮便武陵。雙環頻叩總無膺。香留奉倩聞還否。琴
報文君聽未曾。每惜深春花易老。更傷多病酒難勝。笑人
應有樓臺月。咫尺關干各自凭。

其五

螺髻雙垂態更愁。避人行動未曾留。諸偷携小扇。思翻蝶徧
采芽。桑學襯蠶窄窄香。鈎移自穩盈盈粉。曆笑長含等閒
一見難消受。說着王昌太不甘。

酬郭萬戶遠寄塞下曲

郭久歷邊戎向暱一漢婦近
聞置室

萬里關山萬里風。手磨殘血試彫弓。蒼駝晚放吹螺甲。黃鼠朝烹灌馬醢。誰說王嬙長有恨。不知蘇武是何功。聞君一事猶堪美。毳帳胭脂比舊紅。

訪木積殷嘉生

湖波如縷柳陰齊。野市重來憶路谿。放鴨船歸潮欲落。販魚人散日看低。三春客夢愁孤棹。十載交情愧舊題。此別期君更何處。月明回首斷橋西。

朱涇道中

柳市西來十里遙。綠陰深處酒旗招。收絲客坐雙叉路。下釣人歸獨板橋。細雨家家耘半夏。高檉樹樹網凌霄。停橈

此地堪終日。無奈東風又送潮。

過茗溪黃人百南園別業

盡道君家隱自真。柴門長掩寂無隣。山中故友猿兼雀。海上名洲鳳與麟。濁酒三杯容岸幘。澄湖十畝足垂綸。屢囂咫尺如天外。何用桃源再問津。

贈歌者李生

生父擅名梨園

麝髻低梳壓繡袍。風流絕似鄭櫻桃。相携五夜情猶短。一曲千金價未高。不分妖姬工盼睐。更嫌狂客易醪醕。憐君獨立仍傾國。始識延年有鳳毛。

雲間楊明府席上贈劇妓管湘筠

十年今始見雲英。不在藍橋幾度行。聞說舞腰長宛約。近推歌眼獨分明。泥金蝶簇吳綾重。軟玉鈎鬆蜀罽平。乞得新詩書扇子。低聲淺拜自通名。

咏白牡丹

誰捧瑤娟出鎖窓。天香國色兩無雙。遲開每作三春殿。獨坐能收百卉降。曉幙助粧珠滿髻。晚庭邀醉玉爲缸。端端去後無消息。長倚東風憶素龐。

別羅溪張仲顯

玄晏先生久閉關。近來偏不厭疎頑。穀城遺卷容披閱。蒿徑枯筇任往還。雙席未離垂柳岸。一杯長對夕陽山。慚予

此去非情。愁成就君家愛獨閒。

新春偶作

一度東風一度春。夢中消息鏡中塵。詩懷落落如殘雨花。信迢迢似遠人。老去最嫌逢節序。貧來長怯訪交親。空餘舊恨難除遣。日向萊妻索酒頻。

豪家園

蜃閣鮫宮世有無。如何塵郭見蓬壺。花間嬌鳥多紅翠。樓上佳人盡綠珠。行客掉鞭窺鎖鑰。隣姬停織聽笙竽。君卿底事鯖猶剩。長遣流膏滿路隅。

送僧

天與孤雲不住身來原無意去無因青山舊記千程路白
麓新翻十斛塵覓句徧題曾宿寺得糧多施偶逢人遙知
到處能相憶風月長教愧許詢

傷友

老大風情更不羈三郎月殿四孃蹊可憐一夜眠如蛻猶
道連朝醉似泥桁上舊箏初換柱篋中遺草半無題仙山
縱是曾遊路巨勝花繁怕易迷

偶過友人山院

小關朱扉蔭綠蘿市塵深處得巖阿花從西苑移將遍石
到南宮拜自多賓客慣來成故事兒童初教盡新歌東隣

便是原思宅桑甕蕭蕭掩似螺

泊舟垂虹亭

虹梁百尺偃滄波聞說仙人此舊過樓妓半垂班竹箔市
商齊占綠楊坡潮通越浦征帆迥路接吳關驛騎多別有
烟光誰領得三高祠畔一漁蓑

經海上道院遇劉羽士感贈

誰遣星壇傍海喚廿年冠帔委烽烟弓刀滿桂燒丹室駝
馬羣驅種木田香像刮殘緣療血藥蘭摧盡爲烹羶方知
漢武真雄主不以窮兵廢學仙

病中寄友

西亭詩
釣竿高插革鞋懸。滿徑秋苔碧似氈。卧病却逢多難日。懷人更屬早涼天。江雲起處初聞雁。庭葉稀來尙有蟬。君去故鄉吾又老。不堪重憶耦耕年。

有贈

誰將菡萏等閒栽。移傍瑤池喜便開。夢短乍回行雨峽。粧輕懶下避風臺。低籠絳袖綠薰麝。小蹙青蛾爲噉梅。須識人間腸易斷。胡麻莫遣出天台。

送陸雨蒼歸浙東兼寄沈明府

別話初濃酒未闌。朱帆早已挂江干。三年戰伐歸人少。一曲驪駒去路難。西子湖頭花冉冉。曹娥渡口柳漫漫。憑君

爲語東陽客。八詠初成帶可寬。

清和偶作

牢落春懷久未開。流光荏苒更相催。挑遺瘦笋穿葵出。叫倦殘鶯待鷓來。親故漸違緣向老。疎狂苟免幸無才。不知何事須消遣。費盡兒曹餉客醅。

贈陶煉師

曾列清都第一班。不知何事到塵寰。飛行咫尺東西海。著作尋常大小山。秦樹未凋花灼灼。漢盤長捧露潺潺。等閒誰敢輕投謁。早有龍蛇爲守關。

咏鶯粟

芍藥玫瑰枉弄姿。雕欄深掩較開遲。最憐昨夜垂頭處。却喜今朝倚笑時。巧樣舊曾偷蜀錦。危粧今欲壓吳姬。從來大雅輕蘭麝。不遣遊蜂過便知。

過友人園居

萬木陰陰草徑斜。主人長在釣魚槎。黃鸝一轉更無鳥。紅藥滿欄方是花。石磴修篁留刻句。風鐺活火待烹茶。君家好事新尤甚。移得朱亭跨柳洼。

和友人聞粧

曉日當簾綉鳳遮。薇湯初進袖應叉。定知調粉掀螺盒。却想停梳整翠珈。香膩領雲還鄭重。黛添眉月更天斜。夜來

猶喜玫瑰放。不向門前喚買花。

山行贈范隱君

石路苔深屐盡露。主人猶未出茅檐。懸枝野蕪稠於葉。罽檻寒藤密似簾。八座只聞風謾謾。行歸惟見月纖纖。重來還恐難尋覓。記取西峯第幾尖。

送王將軍喪歸遼 王所居名蛤川

老懷容易為愁牽。重到西州淚泫然。從乏麥舟慚此日。每逢醴酒憶當年。經營旅襯披蛛網。收拾歸魂到蛤川。記得賓朋長滿座。江頭素紉只空懸。

雲間遇故人邀登水樓

不耐逢人便作愁。相携笑上藥珠樓。一春花柳空經眼。舊日親朋幾到頭。傍水歌聲多縹緲。隔簾粧影最風流。歸來誇向漁樵侶。盡怪衰翁亦夢遊。

病起寄唐彥方

手捉紅藤點砌苔。中庭芳草密於栽。蜂窩鬧處潮初上。蟻路忙時雨欲來。雙鬢流年憑小鏡。一春愁夢托淡盃。故人空有看花約。昨夜醪醑滿架開。

酬淮上王統軍見寄

玉簫銀燭紀追歡。一別滄江歲月殘。往事不堪猶入夢。遠書誰復便加飡。經年枕簟人應老。滿地繒羅路正難。買得

烏犍纔習手。可能重據伏波鞍。

劉上舍席中贈小姬楚芳

姬善南音。吳門范生高弟。時范亦在坐。

未上頭時覺太愁。近看風調竟江南。初圓小夢鴛鴦枕。慣縮春愁玳瑁簪。新賦更誰誇宋玉。舊師行欲逼何戡。年來久與花緣薄。說着丁香也笑含。

寄金陵尤孝廉

半生淪落鬢蒼蒼。久分無才敢自傷。江海故人疎雁足。歲時哀淚滿魚腸。支離病骨先秋冷。汗漫吟篇盡日忙。若使他年重相憶。君公今已在東墻。

武林遇閩漳林孝廉

長堤風暖綠初稠。頭白王孫未倦遊。滿眼興亡詩易得，半生落拓酒難酬。閒思舊懋尋松院，旋逐新聲度水樓。惆悵明朝重別處，柳花如雪暗行舟。

訪舊

怪道經時不下樓。今朝粧裹更風流。簾邊小語歎雞舌，花底潛回點鳳頭。別後行藏知穩便，春來消息總沉浮。誰憐此會猶攜病，動說淹遲惱未休。

偶登洞神宮水樓聽道流講義

僊幢遙去絳珠樓。塵策還教此暫留。仍有公孫談白馬，曾無老子駕青牛。椰榆萬古憑誰問，指點三山枉自求。閒捲

筠簾秋一色，斷雲歸鳥遍汀洲。

陸右桓過訪皇慶不遇寄謝

滿階殘葉漬苔深。慚愧吟鞭到遠林。應笑學禪仍有累，謾言看竹本無心。閒堂幸是留僧掃，浪跡難教放鶴尋。十里秋光渾不減，一瓢長擬掛松陰。

夜宿皇慶酬許潛壺見寄

野寺秋清獨不眠。梵堂僧散一燈懸。誰憐未老先多病，自笑無能也學禪。別殿疎鐘連永夜，荒城急柝動涼天。故人莫問幽棲事，萬竹橋西月正圓。

戲贈繩技

綉襪凌空顛欲酥天然一幅散花圖樓開金谷何須墮橋
出銀潢不用扶裊裊晴絲縈軟蝶融融錦浪漾輕鳧還愁
舞罷難留挽跳入僊人碧玉壺

江上送客

江柳陰陰晝漏遲送君偏在落花時含香旅婦吹銀管勸
酒山人贈玉芝還喜暫留因暮雨最愁重問是前期客中
歲月多難遣從此能消幾日思

客中寄故里同人

莫道迂疎不稱遊儻居仍似住林丘便非江夏愁題賦除
是山陰懶放舟舊社音書空汗漫敝廬風雨廢綢繆年來

已作忘緣客爭奈蕭蕭兩鬢秋

同李扶九飲皇慶西閣贈慈上人

谿橋舊路草如茵度竹穿松不厭貧每到到時多勝日近
來來客例詩人淡情那說桃花水美味長懷麩米春却笑
談玄成底事一生支許枉相親

和友人寒食憶內

人去樓空歲月徂新詩猶憶訪鴻都檀奴詠罷愁應老香
令眠時冷未蘇翠落釵鈿雙燕柝蛛封鏡匣一鸞孤傷心
可待逢寒食夜夜啼鵲上井梧

王達可久客齊梁歸家訪贈

曾置室濟南

不分相呼是故鄉。隣間多換徑，多荒吟同越。客歸還病，貧似秦人老，更傷幸有酒漿。非北斗何勞蟋蟀，又西堂從今共作山阿計。懶讀淮南桂樹章。

和友人咸陽懷古

西州舊是傷心地，可獨流人涕。易零齋殿不聞僊，鳥降寢宮惟說鮑魚腥。兵通函谷泥空白，客過周原草自青。祇有多情天寶帝，路途猶唱雨淋鈴。

與羅谿諸君言別次馬士延韻

高燭燒殘酒再傾，休教此夕負平生。人間底事偏多別，我輩猶非不及情。練浦棹移歌獨漉，瑤天笙斷憶雙成。流年

漸暮前期遠，慚愧隣雞半夜聲。

贈海濱醫隱鄭翁

翁將百歲向嗜酒今更倍飲

久攜丹竈任雲汀，松老應知有茯苓。弟子盡看雙鬢白，先生長抱一裘青。鷗巢舊識勤勤護，漁曲新翻細細聽。聞說酒懷同歲長，可教同醉杏花村。

破夢

殘月低窓漏欲停，笑啼難准喚難醒。織魂似縷飄簾幙，暗淚如珠濺枕屏。巫峽不行連夜雨，天河誰渡隔年星。朝來喜子休相賺，曾讀蒙莊化蝶經。

湖上晚歸宿茶磨贈儼上人

廿里松陰日漸低故人聞語出幽谿
搜尋往事君偏熟顛倒春風客自迷
殢醉尚能鸚鵡舞懶歸長任鷓鴣啼
滿湖絲管誰留得只有青山伴杖藜

青溪唐明府席中作

僊館無塵翠簟涼玉壺風動藕花香
期當河朔偏多暇客到臨邛每易狂
杯斝亂飛輕似燕笙歌旋促沸如塘
年來性只耽行樂忘却談經侍講堂

別青溪諸乾一

輕帆早掛去偏難共倚篷窓淚再彈
多阻謾言衣帶近暫留還許酒杯寬
衰年抱病同枯柳薄俗論交罕臭蘭
若問

前期更愁絕九峰雲樹望漫漫

同方中翰宿雨花館因懷高座舊遊

年來何敢嘆蹉跎舊路新知喜共過
銀燭再添春漏迥綉簾初捲夜愁多
攜來市酒猶吳釀聽遍隣箏半塞歌
却憶滿床堆襪襪斷鐘殘雨聽維摩

潛壺留陪歲寒會辭歸寄謝兼呈會中諸公

藪藪綠藤短短篔簹耆英高會敢同過
長辭咳唾驚飛屑便接盃盤怯飲河
歸去紫芝猶可摘年來白石不成歌
緣思大小山何事能使羣仙入網羅

訪西城天立上人時值臥病

路近西林却便過松窓寂寂臥維摩病來君子方爲癯老
覺浮生盡是魔齋鉢久空馴鳥散藥爐長沸野蜂多忘情
不用增惆悵自挽繩樞出薜蘿

贈城南八十張叟

懶學非熊趁後車長留野鶴伴閒廬闌邊慣種難名藥篋
裏多藏未見書東海舊遊逢齧缺北窓高枕近華胥君家
孺子真無術逐鹿纔歸穀已除

偶作

淺醉高歌歲月移關心仍有未開眉杞杷正熟隣墻缺
翡翠將巢水榭欹舊日田園消賦稅近來親友廢琴書衰齡

枉值昇平代杞國憂人不是癡

西亭詩

絕句

吳門雜咏八首

其一 元夕獨坐郡邸

小窓紅燭剪無多
獨引新醪覺易醺
不是羈遊偏寂寞
年來久已厭笙歌

其二 夜坐靈隱暉上人房

風鐺活火沸新泉
坐冷西廊夜半天
數樹梅花一庭月
不知何事更須眠

其三 暉上人房咏瓶梅

西亭詩
折得風前雪一枝小窓同賞費吟卮曾經玄墓山頭住不
是梅花不賦詩

其四

吳門遇老僧詢是先朝貴鎬感爲賦贈

斗笠遮頭雪不如却將麈尾換金魚昇平舊事何堪憶只
記君王讀子虛

其五

過虎丘珠上人房

長憶秋風繫小舫滿簾松月共繙經禪心近日知何似窓
外茶窠已半青

其六

虎丘遇毛聖羽東歸

江上梅花似雪飛相逢俱未換春衣憑君爲寄平安信次

第看山不得歸

其七

山塘送四明桂孝廉北上

虎丘殘雪送征驂醉別山橋柳漸藍一路春風行不盡斷
腸何必是江南

其八

山塘茶館題壁

春來酒貴不經賒日日携錢自買茶記取橋西第三樹碧
簾如水滿欄花

有感

月露風雲事等閒齊梁才子諫瀛寰西朝舊是輕詞賦也
愛清新庾子山

西亭詩
竺林閣與張止菴懷舊

待將尊酒話愁衷酒力纔消淚漸紅數遍少年行樂地一
窓殘火兩衰翁

金閫有感

江南春色正芳菲莫話兵興與歲饑城鼓二通門不鎖滿
街燈火酒船歸

陽羨泊舟期殷嘉生不至 興城東西皆名九里湖

九里水澌斷客槎舊遊無地不堪嗟朝來酒伴曾相約周
處祠前又暮鴉

都門有客談天啓遺事感賦七絕

其一

逆璫擅國多遣內官督師每以犬豕血塗抹體
體濫邀爵賞

近臣偏喜向邊州朝度居庸又拜侯莫道首功容易立路
旁能得幾枯體

其二

逆璫練親軍設御操場於大內妖姆客氏嘗戲
演宮姬客音楷俗呼保姆爲波波乃婆字訛音
也

御操場內列羣娥玉輦歡臨試鸛鷺連鑿赭旗渾不動抱
鞍齊待客波波

其三

熹廟素不諳書逆璫大戮東林教寫刑律數字

君王奎藻日淋漓大半收藏在北司別勅內臣搜宋榻要
臨元祐黨人碑

其四 逆璫生日六宮賜賚無筭託疾偃受崔田二監代爲拜詔

內宮遙見瑞雲凝。賜出泥金萬壽綾。宣罷勅書誰捧接。大兒崔杼小田恒。

其五 京省爭建上公功德祠都門尤盛規制幾侔太廟凡碑碣諛詞皆不敢犯忠賢二字

豐碑勒近五雲居。天子親教上相書。莫以王言忘忌諱。聖賢忠孝總刪除。

其六 客氏喜戎裝時段如暴薨邸客有後言縱騎廉獲客氏親躡其項左右立殺之

妖墓蝕月氣如雲。紅抹堦。蓋錦戰裙雄武不須揮。玉劍一尖踈殺灌將軍。

其七 客氏子侯金吾賜娶華胄百官盡爲迎婚

催妝齊出內和橋。七寶車前似早朝。誰抱合歡花一樹。絳珠團滿柳金條。

渡江別西行友人

瓜步雙帆動客津。一杯從此隔燕秦。休言別淚尋常事。白髮他鄉幾故人。

有客言隱士皆忠臣戲爲詰之

真隱何論世是非。箕山不產首陽薇。雲臺正是風雲會。何故嚴陵戀釣磯。

有客言亡國必由艷妻戲爲解之

動說蛾眉是禍囚。可教嫫媠作天嬪。商家若不行炮烙。妲

西亭詩
已寧非窈窕人

有客以名同古人自詡戲爲嘲之

品價由來不可誣枉將名氏詡同符憑君爲問臨邛客能
令秦王擊缶無

、觀虞姬劇感賦

百戰相隨路已窮死生終不負重瞳如何廣武分羹日呂
雉三年在楚宮

都門送陳廣文之楚

一年兩度挽征鞍那得思君淚便乾休戀三湘舊春色故
人多半在長安

夜宿瓜洲

千戈未定復行遊難覓吹簫舊酒樓今夜月明何處醉亂
山孤枕聽鶉鷓

瓜洲客舍遇高漢思渡江同宿 瓜有嵩山寺

歸興朝來似雨濃雨晴猶未理歸舸憑君載得江南酒同
醉嵩山晚寺鐘

淮城雜咏十首

其一 漂母祠遇馮明思

寒雲黯黯塞天陰尊酒相逢見寸心買得吳鈞在閒却報
恩原只用黃金

其二 觀庫小侯獵

金簇驚翎壓帽低自擎蒼鶻出城西南司不敢收門鑰處
處調笙待馬蹄

其三 送陸天祐之大梁唁故

長淮秋冷葉紛紛貫盡征衣酒未醺多少梁園舊賓客西
風獨上信陵墳

其四 送人之豫

客路貧交枉送行贈君惟有淚珠傾最憐前路秋衣薄兩
岸江楓葉半頽

其五 逢蔣文若燕歸

上苑秋高待鹿鳴中原麟鳳悄無聲從來不識黃金貴郭
隗臺前掉首行

其六 城東卽事

草色陰陰欲暮天解鞍沽酒入谿烟壚頭少婦勤留客笑
捧銀瓶換玉鞭

其七 方文育席中作

雲雨驚飛鶴夢清寶釵零亂十年情無端又向瑤池路到
處偷呼曼倩名

其八 遇楊仲文都護

秋風勒馬駐河湄十載重逢涕對垂把酒同君論舊事只

西亭詩
今惟有謝家兒

其九 城南遇舊

二十年來兩度遊，
巷門長記對花溝。
開簾一笑猶相識，
不信文君竟白頭。

其十 旅居過隣寺留飯戲作

搖落江城起暮寒，
近來行路覺尤難。
不知何處鐘聲動，
撥羈人到木蘭。

題方正學先生祠

木末風高起暮鴉，
空留祠廟泣年華。
江山早道無常主，
猶喜燕王是一家。

題滁陽郭王廟

鼠穴封疆惜未終，
滁河曾泣鼎湖弓。
荒祠寂寂秋風冷，
來往行人說醉翁。

過江陰有感

鴉啼日出少人行，
聞說當年苦戰爭。
多少江南形勝地，
降旗先插石頭城。

同幻公過孟陽先生故宅

社散東林已廿年，
重携禪客弔詩仙。
誰留問字亭前路，
長遣侯芭淚泫然。

江行八首

其一
來往輕舳似席平可知天塹是虛名當時水面猶無鏃底
事曹丕不渡兵

其二

漫說東南王氣雄六朝歌吹轉頭空長江信是無情物纔
有樓船便順風

其三

誰唱當年玉樹歌眼前無復舊山河江流在自深千尺不
及宮前一井多

其四

莫道投鞭斷未能江頭鏤馬亂如蠅緣知一渡尋常事拙
殺樊生理釣繩

其五

虎踞龍蟠允壯圖降旗一揜戍樓孤逢人盡道南兵怯不
信當年有寄奴

其六

故壘寒江一片雲當年成敗幾紛紛儒生功業空千古酌
酒荒臺弔允文

其七

賈舶千檣候汐潮如山玉粒蔽江橋秦淮一水纔衣帶無

西亭詩
奈臺城萬里遙

其八

盼斷江南半壁天樓臺烟雨總凄然而今不敢輕牛晉曾
是清談一百年

婁谿道中

木落江空路正長板橋西去日將黃谿灣小寺初鳴磬一
片廚烟菜粥香

唐紫瑞皇慶病起同飲竹下戲爲主僧索饌

揚州宦背近如何大嚼筠窓客未醒爲語南陽鳩長老好
分餘供及維摩

經故妓院

蘼蕪綠遍舊花谿誰向空樓埽燕泥只有樓前連理樹曉
鶯啼罷暮鴉啼

和友人西湖十二咏

湖上山

南北迢迢錦萬重錢王趙帝舊行踪而今日見旌旄去立
馬曾知第幾峯

湖上寺

鷲嶺西來象教雄無邊金碧漾晴空遊人不到逃亡屋誰
信東南力已窮

湖上堤

十里春光似畫圖
咸淳粧點古來無
當年不向循州去
還道風流勝大蘇

湖上橋

詰曲晴虹一水連
畫欄簫鼓日紛然
行人底事偏惆悵
曾在天津聽杜鵑

湖上船

葉葉風旌颭碧流
生涯長在六橋頭
誰憐海霧江雲外
櫓灰飛戰未休

湖上人

學得吳粧越樣新
相逢一笑更撩人
如何肯向荒村裏
短袖垂鬟獨負薪

湖上晴

落絮遊絲滿鈿車
逢人總說是看花
春風到處堪停策
爭奈山頭日易斜

湖上雨

山色湖光處處愁
六堤人散酒旗收
蓬窓一枕濃於醉
昨日笙歌是夢遊

湖上風

撲面紅塵路欲迷
畫船輕浪撲香堤
披襟莫道行遊爽
無

數飛花怨馬蹄

湖上月

碧落空明水不波
羣峯點點望如螺
清光那許人留戀
白日豺狼此地過

湖上花

鈴索成行好護持
東風留得最繁枝
從來不耐閒紅白
長憶孤山雪月時

湖上柳

怪得吟鞭去較遲
西泠橋畔碧如絲
憑君綰盡同心結
更有長條滿路垂

夏過婁東

黃塵拂面路週遭
六月鄉村未展田
纔到郭門人盡說
江南四郡又加編

懷張其人久客吳江

浪跡江湖歲月空
誰家廡下識梁鴻
遙知澤國秋風冷
雙鬢蕭蕭似短蓬

雨中過皇慶慈上人院

風雨連村酒未賒
相尋原不爲看花
憑君爲掃西堂榻
同聽菱池一夜蛙

題畫冊十首

元人手跡在維揚
友人家見之

其一 褒姒舉烽

烽火兒嬉事可哀。西州宗社隄成灰。方知八百盟津會。只直驪山一笑來。

其二 西施泛湖

烟水蒼茫一棹空。館娃歌吹已濛濛。當年便赦孤臣死。那肯相隨到甬東。

其三 陽臺神女

巫山縹緲楚天開。雲雨無蹤只舊臺。竹向羣臣憶朝暮。屈原猶恐夢中來。

其四 戚姬楚舞

鴻鵠歌殘舞袖欹。千年春市使人悲。若非四皓山中出。會見垂簾百子池。

其五 文君賣酒

不道蛾眉太易沽。鸚鵡裘貫有還無。世間豈少金徽客。却使公然坐酒壚。

其六 陳王賦洛

俘女傾城絕世無。可憐破賊作空圖。東藩一賦尤腸斷。不獨猖狂是大奴。

其七 賈女偷香

青鎖纔窺意已通。好將珍物殫狂童。兒家門戶還輕使。不

西亭詩
比南風在禁宮

其八 太真長恨

五雲樓觀隔仙塵。釵盒雖傳意未真。爲問半留緣底事。范陽應有後來人。

其九 琵琶商婦

老大何堪憶少年。空江幽恨托哀絃。何勞司馬同垂淚。多分當時未學禪。

其十 陶穀郵亭

學士才名向不羣。幽亭此夜伴行雲。爭傳一曲風光好。絕勝陳橋禪位文。

丁卯橋作 楊用修極詆用聊

楚水吳山斷客魂。聊將殘卷伴孤尊。從來不分楊金齒。丁卯橋邊弔許渾。

南溪卽事

松窓睡起月如鈎。臘甕新開不用篋。只聽家西人笑語。賣魚船到水橋頭。

石湖晚眺

兩足西橋一水長。秋風十里稻花香。范公祠下笙歌散。葉葉魚舳弄夕陽。

題畫七首

其一 春塘烟雨圖

桃花如錦柳如絲，蟹舍初開滂水涯。
午睡正醒窓不掩，滿塘烟雨放鷓鴣。

其二 陳機來為余作葡萄便面

賦罷新詩墨正融，一枝輕洒更玲瓏。
看來仍是君詩句，落得明珠出漢宮。

其三 王山人五柳圖

甲子逡巡晉業空，五株猶是舊春風。
已知添得柴桑景，在憶桃源萬樹紅。

其四

薛校書善藏書窮

客散紅樓月滿床，一枝低舞醉霓香。
隋宮花草銷沉久，留得風條習雅娘。

其五

諸內翰邸中閤白下黃夫人畫

老筆高蒼壓俗師，客樓閒展便移時。
若非小篆留山角，誰識金陵女大癡。

其六

橫塘晚歸圖

采菱歌散日看低，家住城南十字谿。
貪向江邊數鷗鳥，不知還在斷橋西。

其七

張子陽溪山小景

日暖山窓墨汁和，閒將霜繭畫雲窩。
谿翁盡喜知名姓，換

得寒魚半簾多

山行竹枝七首

青旗挑出板橋邊
家住花谿酒最蠶
纔坐店門嘗一盞
八哥籠內叫還錢

其二

笆門劈對果園開
山鼠山禽作隊來
裝箇草人形似鬼
竹竿高揭護楊梅

其三

今朝浴佛好天光
齊到新菴了愿香
粧束幾般時樣改
兜羅髻塌練裙長

其四

紛紛笑語出松谿
瞥見行人眼盡低
走向路傍尋石子
烏鵲樹上打山鷄

其五

昨夜輕雷石尙潮
松花小菌嫩於曠
携籃盡上前岡去
嚇得山蛙滿路跳

其六

山腰盤轉見雙旂
慢鼓鼙步隊稀
最後一肩紅板轎
師婆醉抱五郎歸

其七

手弄繚車笑半含山枝滿插鬢髮低聲說向收絲客只
有儂家是早蠶

自題西亭詩後三律

病殘方省惜流年猶向空囊檢舊編陶令宦情銷酒後劉
郎罪案定花前燈昏暮雨珊瑚架麝冷春雲玳瑁箋底事
蠹魚長不去字行零落減神仙

其二

少懷吟癖老尤加待到無成却自嗟雁塔肯教留姓氏鷄
林枉倩作生涯排當柳永誇三變落魄溫岐號八叉猶幸
天公憐太瘦夢中收去昔年花

其三

管城深鑱石君焚見事遲來已十分再世尙愁逢沈約前

身只怕是劉蕡平添白髮應千丈要換青錢可半文從此
別尋終老計一竿烟水一犁雲

西亭詩跋

甚矣吾宗之衰也蓋吾宗先世原籍江右吾始祖文
盛公精天文通地理兼以任俠往來吳會間元末知
天下將亂乃始卜居我膠爲避兵計從此以後遂爲
望族代有聞人其別支之在婁東者又無論矣滄桑
以來人文凋謝以詩文意氣推重四方者惟符奇兄
一人余幼問業於兄繼以醇謹與姪挺如同謬稱於
流輩挺如制舉業更爲一時矜式或以爲延陵碩果
尚有三人實於吾兄無能爲役也吾兄一生大畧見

於西亭詩自序平時留心經濟於天下事實有成竹於胸中至於是非得失之際他人之所不能爲不敢爲者輒以身任之卽有大害弗計也剛腸嫉惡如薑桂之性到老愈辣晚歲獨居常書空咄咄義形於色余詢之曰恨無尚方劔斬某某若干人耳蓋其素所蓄積實欲有所建豎以垂不朽以詩人傳非雅意也夫何木秀風摧士高天忌而兄竟賚志以歿彌留之際以所著西亭詩見授謂余必傳余曰吾志欲爲兄付梓但未知此願得遂與否兄曰必遂荏苒數年有

志未逮而余亦年逾花甲矣兄歿時有子有孫繼皆死亡余一子亦先我而死因念古人無子有以文章傳世爲後嗣者余旣與兄同爲伯道亦惟詩文可以俎豆不祧倘復漫置篋中一旦溘焉朝露而供他人覆甌是斬兄之嗣而身亦自蹈於不孝也方擬典敝廬付剞劂而力宣朱子乃以兄詩及余無罪草呈政督學內閣西江李醒齋先生先生咨嗟太息賜序梓行更搜緝未刊付梓余兄弟亦何以得此於先生哉先生斯文領袖海內宗盟一經品題燕臺長價以此

問世使知吾宗雖衰尚有我兩人我兩人雖亡尚有
一詩與一草庶幾身盡之後名不隨滅則皆先生之
賜而所以得達於先生者力宣之誼爲不可忘也獨
是三百年繁衍之吾宗而僅存者惟我兩人我兩人
一生之志業而所存者惟一詩一草後之君子誦其
詩讀其文亦可以知其遭逢之不偶而志意之有託
矣若我挺如行誼不滅古人而古文詞不著惜哉

丁卯仲夏受業弟莊敬識



程